



# PRESIDÊNCIA DO CONSELHO DE MINISTROS

VIII GOVERNO CONSTITUCIONAL

## MENSAJEN HUSI S.E. SR. MINISTRU PREZIDÉNSIA KONSELLU MINISTRUS NIAN IHA OKAZIAUN LORON INTERNASIONÁL KONTRA KORRUPSAUN, LANSAMENTU PLANU ESTRATÉJKU KOMISAUN ANTI-KORRUPSAUN NIAN (PEKAK TINAN 2021-2025) NO INÍSIU DISEMINASAUN LEI KONA-BA MEDIDA PREVENSAUN NO LUTA HASORU KORRUPSAUN HUSI KAK

**Sr. Komisáriu KAK nian, Sergio Hornai**

**Sr. Presidente CNE nian, Alcino Barris**

.....

.....

**Karu Partisipante sira**

**Señora no Señór sira**

I.

Ida ne'e hanesan ba dala tolu ona iha tinan ne'e maka ha'u hetan ónra hodi partisipa iha eventu sira ne'ebé KAK realiza relasiona ho tema importante sira kona-ba prevensaun no luta hasoru korrupsaun.

Ha'u sempre mai partisipa ho laran haksolok no bainhira ha'u mai, ha'u sempre lori preokupasaun no perspetiva Governu Konstitusionál VIII nian kona-ba hahlok aat ho dimensaun mundiál ida-ne'e no ne'ebé atinje mós ita-nia país. Haú afirma fila-fali mós ami-nia vontade política, hanesan Governu, atu halo ami-nia parte iha luta ida-ne'e no atu garante apoiu ne'ebé nesesáriu no kolaborasaun institusionál ba KAK no entidade sira seluk ne'ebé iha responsabilidade iha área ida-ne'e.

Ha'u tenke tau atensaun mós ba intensifikasiasaun atividade KAK nian iha ninia misaun atu atua hodi prevene no hodi hapara aktu korruptsun iha nia forma oioin! Tanba ne'e ha'u hakarak, hahú ho hato'o ha'u-nia saudasaun ba KAK no ninia membru no funcionáriu sira hotu no fó aten-barani ba sira, liuhusi Sr. Komisáriu Hornai, hodi kontinua ho empeñamentu bainhira hala'o ninia funsaun sira, no buka liután efikásia no impaktu lolos husi atividade sira.

Ha'ú saúda mós Sr. Presidente no funcionáriu sira CNE nian, no ilustre partisipante sira hotu iha eventu ida-ne'e!

II. Ohin ita hamutuk iha biban ida ne'e, loron 9 fulan-dezembru - Loron Internasional Kontra Korruptaun nian.





# PRESIDÊNCIA DO CONSELHO DE MINISTROS

VIII GOVERNO CONSTITUCIONAL

Nasoins Unidas sempre fó hanoin mai ita tinan-tinan kona-ba dimensaun no impaktu negativu oioin husi praktika korrupsaun: tuir estimativa, tinan kotuk, kuaze dolar triliaun 2,6 mak ema na'ok liuhusi korrupsaun, ne'ebé korresponde ba 5% husi PIB globál. Husi dolar triliaun 2,6 ne'e, triliaun 1 hodi selu hanesan subornu! Ida-ne'e signifika katak rekursu lubuk boot mak ema hasai husi karteira investimento públiku sira iha edukasaun, saúde, benefísiu sosiál sira no dezenvolvimentu ein jerál.

Ida-ne'e ninia efeitu maka hamenus “asesu ba rekursu no oportunidade sira” maibé mós hamenus konfiansa ba instituisaun pública sira no ba polítiku sira!

Tanba ne'e Sekretáriu Jerál Nasoins Unidas nian, António Guterres, nota katak, iha mundu tomak, sidadaun sira sai “hirus liután” ho situasaun ne'e. Hahú kedes husi tinan 2018, “Transparénsia Internasional” alerta ba katak esforsu anti korrupsaun paralizadu iha país barak no ida-ne'e determina reasaun maka'as husi sosiedade sivil nune'e mós deskonfiansa ba sosiedade política, partidu político sira no, ikusliu iha Demokrasia!

Tanba ne'e maka ha'u repete iha ne'e:

*“iha mundu tomak luta ne'ebé iha susesu kontra korrupsaun tenke asume laós de'it iha ninia vertente kombate krime nian, maibé mós luta ne'e rasik hanesan instrumentu importante ida ba reforsu no kredibilidade Estadu nian no ninia instituisaun demokrática sira!”*

III.

Iha Timor-Leste mós, luta ida-ne'e tenke la'o tuir perspetiva ne'ebé globál liután, crua setór Estadu tomak no tanba ne'e, kombate hasoru Korrupsaun labele sai hanesan dezafiu ida-ne'ebé fó ba KAK mesak de'it. Órgaun Estadu hotu-hotu nune'e mós atór político sira seluk no sosiedade sivil, setór público no privadu tenke hamutuk ho KAK atu nune'e kombate ida-ne'e bele efetivu liután no, sai nu'udar luta nasaun tomak nian duni!

Ha'u fó hanoin fila-fali katak Relatório Ekonómiku Banku Mundiál nian kona-ba Timor-Leste, iha fulan-outubru 2019, hatete katak korrupsaun sai hanesan obstáculo boot ida ba atrasaun no dezenvolvimentu ambiente negósiu nian iha país ne'e. Iha realidade, besik porcentu 44 husi empreza sira ne'ebé entrevistada konfirma katak ema husu sira atu selu buat ruma, ho osan ka ho vantajen seluk ruma, atu nune'e sira bele hetan asesu no interasaun ho servidór público ruma.

Hirak-ne'e, infelizmente, hanesan dadus baze balu: kona-ba dadus sira-ne'e ita tenke kontinua halo asaun hodi muda tomak realidade ida-ne'e!





# PRESIDÊNCIA DO CONSELHO DE MINISTROS

VIII GOVERNO CONSTITUCIONAL

Ami konsidera katak iha fulan hirak ikus ne'e, ita fó ona pasu boot iha diresaun ida-ne'e ho:

- aprovasaun foim daudaun ne'e, ho unanimidade, husi Parlamentu Nasionál no publikasaun tuirmai Lei n. 7/2020, loron 26 fulan-agostu, kona-ba Medida sira ba Prevensaun no Kombate hasoru Korrupsaun, ne'ebé inklui kontrolu efetivu ba rendimentu husi ema hirak ne'ebé okupa kargu públiku sira;
- adosaun husi Governu ba Programa Reforma Administraun Pública tinan 2019-2023 ne'ebé kontinua hadi'a funzionamentu servisu públiku sira-nian, hodi buka atu reforsa transparénsia, prestasaun konta no posibilidade ba kontrolu sosiál, liuliu husi governasaun eletrónika no tau iha detalhe prosedimentu no responsabilidade sira;
- no agora ho elaborasaun Planu Estratégiku Komisaun Anti- Korrupsaun (PEKA) tinan 2021-2025 no ninia lansamentu .

Iha sorin seluk, to'o agora ita harii ona iha ita-nia país, entidade oin-oin ho kompeténsia atu halo intervensaun tantu iha prevensaun, nune'e mós iha kombaté hasoru hahalok fraudulentu no korrupsaun. Aleinde KAK no Ministériu Públiku, ha'u la haluha atu temi mós Polísia Nasionál, Polísia Sientífika no Investigasaun Kriminál, Inspesaun Jerál Estadu nian no Provedoria Direitus Umanus no Justisa!

Tanba ne'e, ita mós tenke konkorda katak agora ne'e tempu atu halo ASAUN, hatudu resultadu sira no hetan impaktu. Ha'u kompriende katak iha impulsu ba Asaun ne'e, ita mós tenke garante katak kompeténsia instituisaun ida-idak nian tenke klaru atu labele iha sobrepozisaun kompeténsia ka iha kompeténsia ruma maka lakon. Tanba, selae bele iha kakofonia, dispersaun no ita la iha efisiénsia no efikásia!

## IV.

Ikus liu, ha'u saúda KAK no CNE tanba aproveita mós loron ida-ne'e hodi hahú, ho estrutura no funzionáriu sira Komisaun Nasionál Eleisaun nian, diseminasaun Lei n. 7/2020 loron 26 fulan Agostu kona-ba Medida sira ba Prevensaun no Kombate hasoru Korrupsaun.

Mensajen forte tebes ida ba ema hotu: preparasaun no garantia ba eleisaun sira ne'ebé hala'o ho forma livre no transparente, importante tebes ba ezisténsia Demokrasia ida lolos! Tanba ne'e, funzionáriu CNE nian sira tenke kompriende kona-ba sa'ida de'it mak Lei ne'e hatete no kona-ba sira-nia responsabilidade espesiál atu halo tuir lei ne'e!





# PRESIDÊNCIA DO CONSELHO DE MINISTROS

VIII GOVERNO CONSTITUCIONAL

V.

Ha'u taka ho deseja serbisu di'ak ba hotu-hotu no hein katak iha tinan oin iha tempu hanesan daudaun ne'e ita bele ona ko'alia kona-ba rezultadu no asaun barak liután iha prevensaun no kombate hasoru korrupsaun iha ita-nia país! Ida-ne'e maka sidadaun sira hein hela! Ba ida-ne'e mak ita hotu tenke kontribui ho asaun institusionál no atitude individuál oin-oin!

